



KATJUSA
POGAÇI

*Fjala
jonë*

poezi

3111-1
P80.

Katjusha
Pogaçi

FJALA
JONË

poezi

SHTËPIA BOTUESE
«NAIM FRASHËRI»

PARTI

Me ty më të gjera
na janë përmasat
e kohës, të këngës,
të dashurisë dhe fjalës.

Me ty më të thella
i kemi rrënjët,
më të pastër sytë,
më tokësore ëndrrat.

Me ty më e lartë
na është qëndresa,
pranvera më e bukur,
më e dashur jeta.

Me ty e ardhmja
është jona,
kemi ty dhe kemi
lumturi miliona.

Kemi ty dhe jemi
si malet në këmbë,
grusht rreth Enver Hoxhës,
rreth Partisë nënë.

KËSHTJELLA JONË

Mbi këtë tokë, në këtë truall
kështjellën tonë kemi ngritur,
pranvera e veson me lule,
dimri nuse e vesh papritur.

Kështjella jonë e bërë prej jete,
mbrujtur prej zemrash, mpiksur me gjak, —
emri liri i rri te balli
dhe emri qëndresë në prag.

Kështjella jonë fole shqiponjash,
vatër legjendash e burim kënge, —
mëngjesi qetë i ulet mbi supe
dhe dielli i qesh nga mëngjesi në mbrëmje.

Kështjella jonë me çati prej dielli,
me dritare të kthjellëta si e vërteta,
me sy të qartë si ndërgjegjja e kombit
nga ku marrin rrugë ëndrra dhe jeta.

J E T Ë

Me jetën jam e lidhur fort,
thellë zembrës e ndiej e në çdo ind,
ato që më lidhin me këtë tokë
janë gjak i gjakut tim.

Në rast dhimbjeje, vështirësie
kur rreh të më pushtojë dëshpërim' i madh,
hedh sytë të ti, Partia ime,
dhe fitoj forcë e bëhem mal.

Nga fjala e nënës te zëri i fëmijës,
nga thinja e gjyshit te pritmënia për nipin,
të gjitha kanë një bosht e një emër — jetë,
me tokën time lidhen dhe me Partinë e shtrenjtë.

SHQIPËRI, SHQIPONJË ME FLATRA

Shqipëri, shqiponjë me flatra,
rrënjëthella, ballëlarta;
moj flamuri kuq e zi,
fillad mëngjesi, Shqipëri.

Shqipëri, zëri me gjëmë,
malet me gjëmim të rëndë,
fushat me fustan si nuse,
zemra jote gjak e kuqe.

Shqipëri, mëmë e Enverit,
djep i madh ku rritet nderi,
zëri yt këngë lirie,
syri shigjetë trimërie.

Shqipëri, hapi me çika,
vajzat dritë e djemt' petrita,
ballin diell, syrin jetë,
Shqipëri, shqiponjë me fletë...

ËSHTE NËNA

Ajo që s'të shkel kurrë dëshirat e dlira,
ajo që gdhin për ty net pa gjumë,
ajo që ëndërron për ty përherë ditë më të mira
ka emrin e thjeshtë e të bukur nënë.

Ajo që të do në ballë të kohës
dhe me sy të ndien gjer skutat e zemrës,
ajo që të thotë të jesh në krah të shokëve
mban emrin e madh e të shtrenjtë të nënës.